

浮山縣志

地160.723
39
部=

18
13

浮山縣志卷之二十一

人物

邑有人焉則山川生色地以人重由來尚矣浮山繇漢迄宋若霍鮑桑邢諸公勲存宗社名炳天壤卽史冊中指不多屈元明以來雖少遜前烈而崛起顯庸成仁取義與夫儀型桑梓者後先輝映胥山川之秀邦國之光也志人物

漢

浮山縣志卷之二十一 人物

霍

光

字子孟邑南霍村人驃騎將軍去病弟也父仲孺河東平陽人以縣吏給事平陽侯家與侍者

衛少兒私通而生去病仲孺吏畢歸家娶婦生光因絕不相聞久之少兒女弟子夫立爲皇后去病以后姊子貴幸旣壯大乃自知父爲霍仲孺會爲驃騎將軍北伐道出河東遣吏迎仲孺大爲買田宅奴婢而去還復過焉廼將光西至長安時年十餘歲任光爲郎稍遷諸曹侍中去病卒光爲奉車都尉光祿大夫出則奉車入侍左右出入禁闈二十餘年小心謹慎未嘗有過甚見親信征和二年衛太子敗而燕王且廣陵王胥皆多過失是時武帝老趙婕妤有男上心欲以爲嗣命大臣輔之察羣臣惟光任大重可屬社稷乃使畫周公負成王朝諸侯圖以賜光後元二年春武帝居五祚宮光泣問曰如有不諱誰當嗣者上曰君未喻前畫意耶立少子君行周公之事光頓首讓曰臣不如金日磾日磾亦曰臣外國人不如光爲



上以光爲大司馬大將軍日磾爲車騎將軍及太僕
上官桀爲左將軍搜粟都尉桑弘羊爲御史大夫皆
拜臥內牀下受遺詔輔少主明日昭帝襲尊號年八
歲政事一決於光先是後元年侍中僕射莽何羅與
弟重合侯通謀爲逆光與日磾桀等共誅之功未錄
遺詔封日磾穉侯桀安陽侯光博陸侯光爲人沈靜
詳審長纜七尺三寸白晢疏眉目美鬚髯每出入下
殿門止進有常處卽僕射竊識視之不失尺寸其資
性端正如此初輔幼主政自己出天下想聞其風采
殿中嘗有怪一夜羣臣相驚光召尙符璽郎郎不肯
授光光欲奪之郎按劔曰臣頭可得璽不可得也光
甚義之明日詔增郎秩二等衆庶莫不多光光長女
爲左將軍桀子安妻有女年與帝相配桀因帝姊鄂
邑蓋主內安女後宮爲婕妤數月立爲皇后安爲驃
騎將軍封桑樂侯光時休沐出桀輒爲代光決事父
子旣尊盛而德長公主公主近幸河間丁外人桀安

欲爲外人求封光不許又爲外人求光祿大夫欲令
得召見又不許長公主以是怨光而桀安數爲外人
求官爵弗能得亦慙自先帝時桀已爲九卿位在光
右及父子並爲將軍皇后親安女光廼其外祖而顧
專制朝事繇是與光爭權燕王旦常懷怨望及御史
大夫桑宏羊欲爲子弟得官亦怨恨光於是蓋主上
官桀安及宏羊皆與旦通謀詐令人爲旦上書言光
出都肄郎羽林道上稱蹕太官先置又引蘇武前使
匈奴拘留二十年不降還乃爲典屬國而大將軍長
史敞無功爲搜粟都尉又擅調益幕府校尉光專權
自恣疑有非常臣旦願歸符璽入宿衛察奸臣變候
伺光出沐日奏之桀欲從中下其事桑宏羊當與諸
大臣共執退光書奏帝不肯下明旦光聞之止畫室
中不入上有詔召大將軍光入免冠頓首謝上曰將
軍冠朕知是書詐也將軍無罪光曰陛下何以知之
上曰將軍之廣明都郎屬耳調校尉以來未能十日

燕王何以得知之且將軍爲非不須校尉是時帝年十四尚書左右皆驚上書者果亡捕之甚急桀等懼曰上小事不足遂上不聽後桀黨譖光上輒怒曰大將軍忠臣先帝所屬以輔朕身敢有毀者坐之自是桀等不敢復言乃謀令長公主置酒請光伏兵格殺之因廢帝迎立燕王事發覺光盡誅桀安弘羊外人宗族燕王蓋主皆自殺光威震海內昭帝旣冠遂獨任光訖十三年百姓充實四彝賓服元平元年羣臣議立昭帝嗣時武帝六男獨廣陵王胥在咸持廣陵王郎有上書言廣陵王不可以承宗廟言合光意擢郎爲九江太守卽日承皇太后詔遣迎武帝孫昌邑哀王子賀旣至卽位行淫亂光憂懣獨問故吏大司農田延年延年曰將軍爲國柱石可否建白太后更選賢而立之光曰今欲如是於古嘗有此否延年曰伊尹安宗廟世稱其忠將軍亦漢之伊尹也光乃引延年給事中陰與車騎將軍張安世圖計遂召丞相

御史將軍列侯中二千石大夫博士會議未央宮光曰昌邑王行昏亂如何羣臣皆驚愕失色莫敢發言田延年前離席按劍曰先帝屬將軍以幼孤寄將軍以天下以將軍忠賢能安劉氏也且漢之傳謚常爲孝者以常有天下令宗廟血食也如令漢家絕祀將軍雖死何面目見先帝於地下乎今日之議不得旋踵羣臣後應者臣請劍斬之光謝曰九卿責光是也天下洶洶不安光當受難於是議者皆叩頭曰唯大將軍令卽與羣臣俱見白太后太后迺車駕幸未央承明殿詔諸禁門毋納昌邑羣臣入朝太后光與羣臣連奏王罪過不可以承天序奉祖宗廟于萬姓皇后詔曰可王出金馬門就承與副車光送至昌邑邸謝曰王行自絕於天臣寧負王不敢負社稷涕泣而去太后詔歸賀昌邑光與羣臣議定所立廣陵王已前不用及燕刺王子不在議中近親惟有衛太子孫號皇曾孫在民間咸稱述焉光遂復與丞相敞等上

奏曰禮曰人道親親故尊祖尊祖故敬宗太宗無嗣
擇支子孫賢者爲嗣孝武皇帝曾孫病已武帝時有
詔掖庭養視至今年十八歲通詩書論語孝經躬行
節儉慈仁愛人可以嗣孝昭皇帝後奉承祖宗廟子
萬姓皇太后詔曰可光遣宗正劉德至曾孫家尙冠
里洗沐賜御衣太僕以軫獵車迎曾孫就齋宗正府
入未央宮見皇太后封爲陽武侯已而光奉上璽綬
謁於高廟是爲孝宣皇帝明年下詔曰夫褒有德賞
元功古今通義也大司馬大將軍光宿衛忠正宣德
明恩守節秉義以安宗廟其以河北東武陽益封光
萬七千戶與故所食凡二萬戶賞賜前後黃金七千
斤錢六千萬雜繒三萬疋奴婢百七十人馬二千匹
甲第一區自昭帝時光子禹及兄孫雲皆中郎將雲
弟山奉車都尉侍中光兩女壻爲東西宮衛尉昆弟
諸壻外孫皆奉朝請爲諸曹大夫騎都尉給事中黨
親連體根據於朝廷光自後元秉持萬機及上卽位

浮山縣志

卷之二十一

人物

四

乃歸政上謙讓不受諸事皆先關白光然後奏御光
每朝見上虛已欽容禮下之已甚光秉政前後二十
年地節二年春病篤車駕自臨問爲之涕泣光上書
謝恩曰願分國邑三千戶以封兄孫奉車都尉山爲
列侯奉兄驃騎將軍去病祀事下丞相御史卽日拜
光子禹爲右將軍光卒上及皇太后親臨喪太中大
夫任宣與侍御史五人持節護喪事中二千石治塚
賜金錢繒絮綉被百領衣五十篋璧珠璣玉衣梓宮
便房黃腸題湊各一具椁木外藏椁十五具東園溫
明皆如制載光柩以輜輶車黃屋左纛發林官輕車
北軍五校士軍陳至茂陵以送其葬謚曰宣成侯發
三河卒穿復土起家祠堂置園邑三百家長丞奉守
如舊法旣葬封山爲樂平侯上思光功德下詔曰故
大司馬大將軍博陸侯宿衛孝武皇帝三十有餘年
輔孝昭皇帝十有餘年遭大難躬秉義率三公九卿
大夫定萬世策以安社稷天下蒸庶咸以康寧功德

茂盛朕甚嘉之復其後世疇其爵已世世無有所與
功如蕭相國明年夏復下詔曰宣成侯光宿衛忠正
勤勞國家善善及後世其封光兄孫雲為冠陽侯地
節四年秋七月禹等以謀反誅八月已酉皇后霍氏
廢初宣帝立謁廟光從驂乘上內嚴憚之若有芒刺
在背後張安世代光驂乘天子從容肆體甚安近焉
及光身死而宗族竟誅故俗傳之曰威震主者不畜
霍氏之禍萌於驂乘神爵三年圖股肱臣於麒麟閣
而光為首不名署曰大司馬大將軍博陸侯姓霍氏
至成帝時為光置守塚百家吏率奉祀焉元始二年
封光從父昆弟曾孫
陽為博陸侯千戶

後漢

鮑

永

字君長縣北平甯里人父宣哀帝時任司隸校尉為王莽所殺永少有志操習歐陽尚書事後

浮山縣志

卷之二十一

人物

五

母至孝妻嘗於母前叱狗永即去之初為郡功曹莽以宣不附已欲滅其子孫都尉路平規害永太守苟諫擁護召以為吏常置府中永因數為諫陳興復漢室翦滅篡逆之策諫每戒之永感其言及諫卒自送喪歸扶風平遂收永弟升太守趙興到日鮑宣死節豈可害其子也勅縣出升復署永功曹時有矯稱侍中止傳舍者興欲謁之永拔佩刀截馬當匈乃止後數日果下捕矯稱者永由是知名舉秀才不應更始二年徵再遷尚書僕射行大將軍事持節將兵安集河東并州朔部得自置偏裨輒行軍法永擊青犢大破之封中陽侯永雖為將率而車服敝素為道路所識時赤眉害更始光武遣諫議大夫儲大伯持節徵永永疑不從乃收繫大伯遣使馳至長安既知更始亡乃發喪出大伯等封上將軍列侯印綬悉罷兵幅巾詣河內帝問眾所在永離席叩頭曰臣事更始不能令全誠慙以其眾幸富貴故悉罷之時攻懷未拔

帝曰關東畏服卿可且將故人自往城下譬之卽拜
永諫議大夫至懷乃說河內太守開城降帝大喜賜
洛陽上商里宅固辭不受時董憲裨將屯兵於魯拜
永爲魯郡太守永擊討大破之降者數千人唯別帥
彭豐虞休皮常等各千餘人稱將軍不肯下頃之孔
子闕里無故荆棘自除從講堂至于里門永異之謂
府丞及魯令曰方今危急而闕里自開斯豈夫子欲
令太守行禮助誅無道邪乃會人家修鄉射之禮請
豐等共會觀視欲因此擒之豐等持牛酒勞饗而潛
挾兵器永覺之手格殺豐等擒破黨與帝嘉其畧封
關內侯遷楊州牧誅疆橫而鎮撫其餘百姓安之母
憂去悉以財產與孤弟子建武十一年徵爲司隸校
尉帝叔父趙王良尊戚貴重永嘗劾良曰今月二十
七日車駕臨故中郎將來歛喪還車駕過須臾趙王
良從後到與右中郎將張卬相逢城門中道迫狹叱
卬旋車又召侯岑尊詰責使前走數十步按良諸侯

浮山縣志

卷之二十一

人物

六

藩臣蒙恩入侍知尊帝城門侯吏六百石而肆意加
怒令叩頭都道奔走馬頭前無藩臣之禮大不敬也
由是朝廷肅然莫不戒愼又辟扶風鮑恢爲都官從
事恢亦抗直不避疆禦帝常曰貴戚且宜斂手以避
二鮑其見憚如此永行縣到霸陵路經更始墓引車
入陌從事諫止之永曰親北面事人甯有過墓不拜
雖以獲罪司隸所不避也遂下拜哭盡哀而去西至
扶風椎牛上苟諫冢帝以問公卿大中大夫張湛對
曰仁者行之宗忠者義之主也仁不遺舊忠不忘君
行之高者也帝意乃釋後大司徒韓歆坐事永固請
之不得以此忤帝意出爲東海相坐度田事被徵諸
郡守多下獄永至城臯詔書下曰君晨夜冒犯霜露
精神亦已勞矣以君帷幄近臣其以永爲兖州牧也
永便道之官視事三年卒子昱建中初復爲司隸奉
法守正有父風孫德曾
孫昂以志節孝義著

五代晉

桑維翰

字國僑浮山人父珙嘗事張全義因居河南維翰為人醜怪身短而面長常臨鑑以自奇曰七

尺之身不如一尺之面慨然有志於公輔初舉進士主司惡其姓以為桑喪同音人有勸其不必舉進士可以從它求仕者維翰慨然乃著日出扶桑賦以見志又鑄鐵硯以示人曰硯弊則改而它任卒以進士及第晉高祖辟為河陽節度掌書記其後常以自從高祖自太原徙天平不受命而有異謀以問將佐將佐皆恐懼不敢言獨維翰與劉知遠贊成之因使維翰為書求援於契丹耶律德光已許諾而趙德鈞亦以重賂啖德光求助已以篡唐高祖懼事不果乃遣維翰往見德光為陳利害甚辯德光意乃決卒以滅唐而興晉維翰之力也高祖即位以維翰為翰林學士禮部侍郎知樞密院事遷中書侍郎同中書門下

浮山縣志

卷之二十一

人物

七

平章事兼樞密使天福四年出為相州節度使歲餘徙鎮秦寧吐渾白承福為契丹所迫附鎮州安重榮以歸晉重榮因請與契丹絕好用吐渾以攻之高祖重違重榮意未決維翰上疏言契丹未可與爭者七高祖召維翰使者至卧內謂曰北面之事方撓吾胷中得卿此疏計已決矣可無憂也維翰又勸高祖幸鄴都七年高祖在鄴維翰來朝徙鎮晉昌出帝即位召拜侍中而景延廣用事與契丹絕盟維翰言不能入乃陰使人說帝曰制契丹而安天下非用維翰不可乃出延廣於河南拜維翰中書令復為樞密使封魏國公事無巨細一以委之數月之間百度寢理初李瀚為翰林學士好飲而多酒過高祖以為浮薄天福五年九月詔廢翰林學士按唐六典歸其職於中書舍人而端明殿樞密院學士皆廢及維翰為樞密使復奏置學士而悉用親舊為之維翰權勢既盛四方賂遺歲積鉅萬內容省使李彥韜端明殿學士馮

王用事其讒之帝欲驟黜維翰大臣劉昫李崧皆以爲不可卒以玉爲樞密使旣而以爲相維翰日益見踈帝飲酒過度得疾維翰遣人陰白太后請爲皇弟重睿置師傅帝疾愈知之怒乃罷維翰以爲開封尹維翰遂稱足疾稀復朝見契丹屯中渡破樂城杜重威等大軍隔絕維翰曰事急矣乃見馮玉等計事而謀不合又求見帝帝方調鷹於苑中不暇見維翰退而嘆曰晉不血食矣自契丹與晉盟始成於維翰而終敗於景延廣故自兵與契丹凡所書檄未嘗不以此兩人爲言耶律德光犯京師遣張彥澤遺太后書問此兩人在否可使先來而帝以維翰嘗議毋絕盟而已違之也不欲使維翰見德光因諷彥澤圖之而彥澤亦利其貲產維翰狀貌旣異素以威嚴自持晉之老將大臣見者無不屈服彥澤以驍悍自矜每往候之雖冬月未嘗不流汗初彥澤入京師左右勸維翰避禍維翰曰吾爲大臣國家至此安所逃死耶安

坐府中不動彥澤以兵入府問維翰何在維翰厲聲曰吾晉大臣自當死國安得無禮邪彥澤股栗不敢仰視退而謂人曰吾不知桑維翰何如人今日見之猶使人恐懼如此其可再見乎乃以帝命召維翰維翰行遇李崧立馬而語軍吏前白維翰請赴侍衛司獄維翰知不免顧崧曰相公當國使維翰獨死崧慙不能對是夜彥澤使人縊殺之以帛加頸告德光曰維翰自縊德光曰我本無心殺維翰維翰何必自致德光至京師使人驗其尸信爲縊死乃以尸賜其家而貲財悉爲彥澤所掠祀鄉賢

字叔明浮山人僑濟陰太平興國初五經擢九經及第授大理評事知泰州鹽城監賜錢三十

萬昂請監改隸楚州從之明年召爲國子監丞遷尙書博士出知儀州就轉國子博士代還賜緋選爲諸

王府侍講雍熙中遷水部員外郎改司勳端拱初
金紫累遷金部郎中眞宗改司勳俄知審刑院以昂
儒者命劉元吉同領冬遷右諫議大夫咸平初改國
子祭酒二年爲翰林侍講學士校定周禮儀禮公羊
穀梁春秋傳孝經論語爾雅義疏加階勳俄爲淮南
兩浙巡撫使於便坐令講左氏春秋侍讀預焉五年
講畢宴於崇政殿賜襲衣金帶加器幣仍遷工部侍
郎兼國子祭酒學士如故知審官院權知院事景德
二年上言亡兄素嘗舉進士願霑贈典特贈大理評
事是夏幸國子監閱庫書問經版幾何昂曰國初不
及四千今十餘萬經傳正義皆具臣少從師業儒時
經具有疏者百無一二蓋力不能傳寫今板本大備
士庶家皆有之斯乃儒者逢辰之幸也先是印書餘
紙鬻以供監中雜用昂請歸之三司上又令舉經術
該博德行端良者以廣學員三年加刑部侍郎一日
上從容語及官邸舊僚淪喪殆盡唯昂獨存翌日賜

白金千兩且詔其妻至宮庭賜冠帔四年昂以羸老
自陳願給假一年歸視田里上命坐慰勞之因謂曰
便可權本州何須假耶拜工部尙書知曹州職如故
辭曰賜襲衣金帶特開龍圖閣召近臣宴崇和殿上
作五七言詩二首賜之預宴者皆賦昂視壁間尙書
禮記圖指中庸篇曰凡爲天下國家有九經因陳其
大義上嘉納之及行又令近臣祖送設會於宜春苑
大中祥符初東封召還命判留司御史臺進禮部尙
書昂素習田事多悉農家說爲對三年請告特詔太
醫診視六月上親臨問賜名藥一奩白金器千兩繒
絲千匹命中書召其子太常博士知東明縣仲寶國
子博士知信陽軍若思還侍疾踰月卒年七十九贈
左僕射三子並進秩初雍熙中昂撰禮選二十卷獻
之太宗探其帙得文王世子篇甚悅問衛紹欽昂爲
諸王講說會及此乎紹欽曰諸王常時訪昂經義昂
每至發明君臣父子之道必重復陳之太宗益喜眞

宗因內閣暴書覽而稱善召昂同觀作禮選贊賜之昂言家無遺稿願得副本上許之繕錄未畢而昂卒
亟詔寫二本一本賜其家一本俾置家中昂講孝經禮記論語書詩左氏傳據傳疏敷引外多引時事爲喻深被嘉獎上嘗問管仲召忽及鄭注禮記世子篇各隨其事理以對仲寶爲三司判官至祠部郎中坐事貶卒若思終駕部郎中祀鄉賢

元

張天瑞浮山人原籍江西祖名海宋末遷平陽路遂居焉殷富甲於鄉里世祖西征道經平水天瑞以才畧備參謀會軍之食輸粟萬石助之一軍悉贍封爲萬戶侯錫以五蠻蟒玉墓文具載其事

明

浮山縣志

卷之二十一 人物

十

暴

昭

浮山人洪武中由國學生授大理寺司務三十年擢刑部右侍郎明年遷左都御史尋改刑部尚書耿介有峻節布衣麻屨以清儉知名建文初充北平採訪使具得燕邸不法狀密以聞請預爲備燕兵起設北平布政司於正定昭以尚書掌司事與鐵鉉輩悉心經畫諸軍敗召歸金川門陷出亡被執抗言大義聲色俱厲文皇怒去齒以手指之截手脚蹴截脚猶詈聲不絕斷頭乃已福王時贈昭太保諡剛烈祀鄉賢

李

信

浮山人起家縣掾洪武中用薦擢顯慶吏部侍郎拜尚書六部初屬中書省權輕仰承丞相意指自元年滕毅始位尚書歷陳修詹同吳琳趙好德稱賢然亦無大建暨至十三年中書省革部權乃專銓衡爲尤要顧得及其位者寡余煥以排宋訥誅翟善貶杜澤未數月罷惟信歷少宰家宰二載入

觀官各舉所知定內外封贈廕敘之典後遂垂為一代令甲上甚委任之以勞勩卒於官

韓永

浮山人建文時擢戶科右給事中永豐幹美髯目光如電吐音洪亮每論時事慷慨激切于兵畧尤中肯綮帝善之方期大用靖難之變撫膺欲死召至見其丰采成祖欲官之永曰吾王蠲耳何以官為不屈而死福王時贈太常寺卿諡莊介祀鄉賢

陳福

俊子以孝稱始以儒士克藩掾既改隸兵部武選司膺力善劍正統己巳秋英宗北狩福方歸省聞變即投袂起自詣縣官號泣請赴難當事授以裨將與將軍石彪聲援相應屢建奇功當歸凱患甲風未及受賞而卒後以子孜貴贈監察御史孜同年吳寬頌以詩曰萬里烟塵雙劍掃九天日月一身扶

祀鄉賢

浮山縣志

卷之二十一

人物

十一

蓋繼富

世居邑西門內天性忠義膽力過人慷慨有志節當英宗北狩偕陳福赴難並隸石將軍麾下大戰於鴈門關外奮勇先登卒陷陣以死朝廷優表其閭祀鄉賢

陳孜

福子字勉學少孤育於繼母范氏中成化乙酉鄉試第四名壬辰第進士登吳寬榜初授浙江慈谿知縣興學校以育賢才敦孝弟以厚風化民有濱海田歲久湮沒徵稅如故奏請除之大新邑學重立董孝子祠又於縣治前創建書院一所選令俊秀楊子器姚謨等二十餘人讀書其中延名儒錢源教之暇則親為講解後多登第為名臣戊戌擢貴州道監察御史將行老幼悲泣送者不啻以萬計至總馬橋擁輿令不能即去脫其履懸之邑門及巡鹽兩淮商人多勢要一以公平正大處之無敢犯其令者巡茶陝右用法嚴明私販屏跡時吏部尚書尹旻子編修龍所為多不法抗章論之悉罷黜巡按山東舉賢

能糾貪墨貞度肅儉人振風紀洪治初首陳十四事朝廷咸採而行之已酉陞湖廣按察副使錄囚湖南北多所平反施州苗白嘴鼻負固恃強奪宣慰之印十餘年官不能取時天官馬文斗爲司馬檄令孜提兵討之孜聞命甚喜妻病劇不治束裝卽行及至詢諸父老得山川之形勢乃選漢土軍二萬親爲節度令四川之兵塞其南荊州之兵捍其西施州之兵扼其東自以精甲當其北苗所居之地名銀山嶺前憑大江後倚峭壁自來官兵未至其地孜令諸軍薄暮蓐食銜枚疾趨昧爽直抵其巢賊不意我兵猝至皆驚擾四奔孜傳令曰吾所誅者白嘴鼻一人耳無預若事諸苗聞之悉解甲投戈而降擒渠惡五十人餘置不問收其所奪印五顆捷報欽賜赤織金紵絲衣二襲鈔千錠馬公文升覆奏曰陳孜不避艱險躬抵賊穴平負固之苗獲久失之印竭忠爲國奮不顧身若以尋常之賞酬功恐後勤事者解體於是緞加

浮山縣志

卷之二十一

人物

三

以四鈔亦倍焉且勅吏部進階值其繼母范氏卒卽解任歸服闋再任湖廣副使洪治己未進雲南按察使執法如山風行六詔巡撫都御史陳金巡按謝朝宣連章薦其才可大用疏竟留中壬戌當朝觀黔國公沐崑餽贐金三百兩弗受沐公贈詩曰明如霽月懸銀漢清似寒冰湛玉壺癸亥進陝西右布政使辭不行朝廷令山西撫臣催促赴任陝西撫臣移文敦請不得已於甲子暮春始至任未幾進貴州左布政使及致仕鄉居朝廷命有司待以優禮歲時存問嘗以天下宗枝日繁而國家財用有限恐十年之後民不能支欲加裁損庶民困少蘇又以宦官鎮守各省日糜廩餼而百端擾人無益於事宜悉革去疏上朝廷不能用平生簡靜寡言笑對妻子如賓客疾惡甚嚴不干權要居官三十餘年著羔羊素絲之節云祀鄉賢祠

張 獻 成化間貢授鴻臚寺序班陞陝西考成知縣正
直端莊明敏采決才幹有餘多所建造吏民懷之

張永茂 嘉靖元年歲貢授陝西綏德州判官尋陞安定
知縣公正廉明居官十三載致仕歸囊篋如洗

一第不治性醇謹喜善俗遇鄰里宗黨率以孝弟忠
信曉諭卒之日老幼胥垂涕焉

齊 鳳 嘉靖四年貢任滑縣丞嗜學博聞佐滑九年多
善政邑人戴之如召杜告歸囊篋一空有清名

李一本 東陳村人光祿寺敏五世孫嘉隆間以明經授
陝西同官令泣事三日公出還將入門有大風

自北來旋遶其車靈沙震蕩聞有嗚咽聲一本私祝
日有冤耶吾當為爾雪之風遽止出片紙書捉北風

三字授二健役俾速致之役不知所謂過野店索酒
共飲一役誤戴同行之冠先出周遊店外忽被狂風

吹落野井引繩入取有遺骸在焉駭愕回店會有人
呼北峯哥者役詢之姓卓字北峯即店家也役奇其

浮山縣志 卷之二十一 人物 十三

姓字之脛合執見一本訊之立服蓋先有布客宿其
店北峯利其財殺之投屍井中也並收其黨三人寘

諸法一時
稱神明焉

蓋紹仁 萬曆八年貢授四川彭水主簿陞山東臨朐縣
丞剛正嚴肅蒞官兩任裏衣不服一絲帛而學

問閎博為士
林所欽焉

張九德 字見徽萬戶侯天瑞之後萬曆三十年貢授直
隸香河縣丞陞贊皇知縣正直孤介風裁嚴毅

天啟中魏璫勢傾朝野九德以不建生祠忤削籍歸
里讀書談道怡然自得

蓋大統 萬曆四十二年貢授山東鉅野縣丞陞齊東知
縣時白蓮教作亂力為守禦設計擒渠魁徐洪

宇穢之當道稱其定識
如山兼有才名見舊志

齊國賢

字德齋邑廩生素以氣節文章自負崇禎五年

國賢怒罵不絕口遂遇害弟婦葛氏侄婦張氏相繼
死節時國賢甥葛榮亦被擄具言其德行風烈於賊
賊感歎祭以豚知縣李乘雲上其事褒之曰生負奇
才月旦之評不爽死全大義歲寒之操可嘉雖綠林
之暴尚悔禍而革心而碧血之魂當浩然以吐氣葛
氏捐身於絕壑張氏畢命於重泉三烈一門英徽振
古勅賜浩氣塞天之額以
旌其烈祀鄉賢並祀忠義

高象先

字斗南邑庠生甲申秋邑署偽官象先被執偽
衡山伯欲磔之至死無屈當事旌之祀鄉賢並

祀忠義

馬三接

崇禎十二年貢事親以孝聞性古樸隱德弗仕
邑令旌曰義皇上人

浮山縣志

卷之二十一 人物

四

葛舜元

崇禎十四年貢性孤峭廉介好讀書教三子一
孫俱入庠

國朝

秦士鳳

邑武庠生順治己丑浮邑為土寇所困士鳳分
戍東城三月二十日與賊戰於北石村殺傷相

當次日逐賊於邢翟村時賊據南山為險知縣王廷
佐親率鄉兵禦之我兵恃眾緣崖而上士鳳獨當一
面奮勇先登賊頗披靡而後軍不繼力竭被殲從行
義勇劉波武生喬瑾奮身救之胥遇害王公撰文遙
祭辭極悲慘士民皆為感
泣死年二十有九祀鄉賢

李先春

邑武庠生曾任晉陽守備習行間事邢翟之役
先春領鄉兵冒險衝陣揮大刀連砍數賊以悞
踐危石而蹶遂被害子李全娃亦同時戰死邑人弔
之有憐君父子俱殉國午夜愁聞杜宇聲句祀鄉賢

王牧民

字仁寰生員王心子順治間以明經授浙江平湖縣丞甫蒞任海寇奄至城破廼降牧民執節

不屈死之

祀鄉賢

郭皇圖

字鞏之順治五年副榜性聰敏文章卓犖倚馬可待尤工書法任江右德化令一時文字多出

其手各憲及同寅

胥賞鑒推重焉

齊鳴珩

以諸生選舉授鴻臚寺序班性仁孝持已恭儉接物慈和鄉里咸稱為長者卒之日老穉胥隕

涕焉

秦吉士

字楨皇歲貢生博學工詩詞尤善書翰順治間邑侯安應耀子世鼎知保德州辟為記室岢嵐

道樓義視師保德見而奇之即令署保德學正

浮山縣志

卷之二十一 人物

十五

張光燦

字文垣廩貢考授教諭性純孝早喪母事繼母秦氏色養兼至平生讀書樂道潛心理學以躬

行實踐為務襟懷磊落結納英豪然諾不欺睦姻任恤尤篤親黨凡邑中公務竭力蠲辦人有以急難告者輒轉應之貧不能償輒焚其券每遇歉歲變產賑饑存活甚眾設義學以教里中子弟多所造就至今

傳誦不衰

祀鄉賢

齊鳴嚶

字友聲恩貢生天姿穎異好讀書過目不忘品行剛方言行一秉古道士風賴以維持康熙十

二年纂修縣志至公無私太守吳公給扁旌之日克振唐風

喬昌齡

字允公一字錫九康熙壬子科舉人穎悟過人奮志芸憲尤潛心濂洛關閩之旨學者師之秉

鐸沁郡崇正學砥廉隅端士習勤課業沁之人文於是丕變時值大同軍興上憲委佐本郡籌畫運輓一

切布置井井有條上不悞國下不累民沁州人士至今傳頌不衰

李獻廷

字魁生賦性恬澹潛心詩書講學授徒主盟文社者四十餘年

張天經

字恒齋穎異好學博極羣書尤長於詩十五入泮旋食餼以明經秉鐸山陰邑近邊塞士嫻戎

馬多剽悍之習從容化導文學而外更以飭躬砥行為務俗為之變弟子員有被誣者必力白其冤不為當事屈抑邑舊有陋規凡販炭者十取其一以供兩學捕衙之需悉除之且出示日取彼烏金供我紅爐者青烟赤焰之下於心何忍至今膾炙人口學田六百畝歲入租俱分給胥斗毫不染指後以恩例應補縣尹以終養辭不就徜徉里門詩酒自娛著有塞上吟藏於家

喬建廷

字靖公歲貢兄弟六人廷居長待諸弟極其友愛尤潛心理學手不釋卷教授子姪生徒津津

浮山縣志

卷之二十一

人物

共

不輟操觚文社遠近師之

張大綸

字建白性聰敏十歲能屬文十三膺選拔恬靜嗜學敦篤孝友姪鴻舉少失怙恃撫育教誨一如已子至於成立城垣以地震傾圮捐資協修康熙

庚子辛丑歲荒捐粟六百石集城隍廟賑饑全活甚眾一切田租慷慨豁免復煮粥以食窮人邑侯旌褒之

衛九疇

字建中歲貢任蒲縣訓導課藝生童內有王會方家寒不能應試疇給資食之製衣衣之會方

入泮鶚薦皆疇之力也時蒲令向生員亢某借貸不遂尋隙堅欲詳革九疇力庇與令互揭疇直令曲亢生得全後致仕歸里蒲邑諸生往來請益者絡繹不絕

張大統

字道庵少磊落不羈折節好學事親先意承志能得真歡心友于兄弟自同居以迄分爨數十

年毫無間言性好施予以濟人利物爲懷雖傾囊不惜浮邑自乙亥地震後學宮傾圮鞠爲茂草統出貲數千金獨力捐修又創建尊經閣以補前所未備文昌閣一併修葺重新傍建舖面七間房院一所歲入租銀以資諸生鄉試路費復於西城上建魁星樓以培風脉丁酉浮邑席豐果中經魁統亦並列賢書浮邑山路崎嶇巨壑千尋行人每有顛危之慮捐貲巨萬覓人平治其有路僅羊腸無可開闢者則購買民田以式廓之四路盡成坦途各建茶房施茶濟衆歲以爲常浮東詣澤州中途有梅尾山者猛虎出没人跡絕少力闢蠶叢創建茶房客舍俾成孔道行人便之歲庚子辛丑饑饉荐臻一切田租盡行豁免除捐米百石送縣賑荒外更於門前煮粥以食饑者三年財盡粟匱稱貸以繼奉

旨設立義倉勸衆捐輸獨力捐穀八百石加意總理以備荒歉浮邑童生科歲額進入各統極力周旋懇請上

浮山縣志

卷之二十一 人物

七

憲疏請改爲中學至今每考廣額四名設立義學延師廣教生童應試出貲脩卷庠友赴科解囊贈費製藥餌以蘇疾病施棺木以周無告冬月天寒給薪炭以體恤城門更夫浮邑衙署頽壞官斯土者幾同露處統倡義募建百餘間縣治煥然一新邑有駐防司者棲止無地倍出橐金兼募立官署使得有攸宇縣治左神山書院邑舊察院也傾圮無存統倡募督修經營數載廢者重興城南三十里有天聖宮者浮邑勝地捐貲倡修五載丁竣合社立祠祀之里人重修玉兔寺工垂半而需用不繼請於統捐貲玉成之浮舊城門低隘倡義改修又邑侯修建倉廩建立先農壇聘請督工統經畫盡善出納分明從中賙補尤多學憲劉公按臨平水合庠公舉孝廉以爲善最樂四字旌之欽奉

上諭令州縣各舉孝廉方正合邑公舉統藩憲高公屢取赴省邑令促行甚急統再三以終養辭乃給孝友爲

政區額以示獎勵三晉當道諸公與邑侯及鄉里戚友旌匾無算數百里外識與不識皆稱為浮山張善人郡守樊公延至公署欲保舉入京

陛見選用力辭不赴享壽五十五歲沒之日哀聲遍野造門祭奠者數十日不絕合邑紳士追思其德謚為文惠先生

張嗣榮

字欣木號桂崖性孝女孩提時依依祖膝下卽得其歡心年少泚大理司務贊勳廷尉著有能

聲尋遷農曹會計澄清怡賢親王暨司農常熟蔣公深器重之時

盛京戶部積習廢弛於部院中徧行遴選簡授出關竭誠

殫慮一切陋規猾胥弊竇釐剔殆盡初理糧儲凡自

都門發遣邊地者於勘驗時哀憐其狀給與衣食尋

調錢糧司凡應接外藩所費俱於內部咨領進京旅

浮山縣志

卷之二十一

人物

六

何為關外三載劄滿回京擢授陝西道監察御史協理山西道事京師地廣人雜五城司坊等官凡路遇克徒以地非管轄不便越拘逃脫紛擾經樂奏請毋泥越境之跡互相稽查地方寧謐先是京師交易錢文止聚集正陽門外牙行一人定價任意喝報更將錢舖占定主顧不許更換貿易把持錢行大為民蠹經樂奏請牙帖分設五城聽民交易商賈稱便掌陝西道事有稽察刑名之任事務繁劇每案悉心研審讞獄多所平反後以足疾告歸一病不起人甚惜之

齊

詰

字僊生歲貢襟懷爽邁豪放不羈喜讀書至老不倦邑令聘為義學先生教授生徒循循善誘

成就者數十人文風丕變雍正庚戌肄業成均司成孫崔二公嘉其學問優長人品端方各賦詩贈之和者百餘人嗣秉鐸汾郡日與諸生講書課文凡以文質者引繩披根必本先儒正理居官清苦卒之日囊

無餘貲至不能具附身之物郡守張公表其靈曰古之君子偕邑令各贈賻儀助其歸里合郡紳士胥贈賻弔奠泣送數十里其為士林所愛重如此

喬德徵

字升聞廩生幼孤攻苦詩書過目不忘賦性仁恕居家孝友年十三父卧病親嘗湯藥不離左右及父卒哀毀骨立盡哀盡禮友愛昆弟姊妹凡一切衣食婚嫁獨力任之母病虔禱祈減已筭以增母

壽母病果愈人以為孝感所致雍正戊申學憲奉命甄別士行公舉行優郡守旌其門曰潛修有素已酉恭

遇

世宗憲皇帝特恩詔令京外官各舉品行端方才優民社之士經廣西按察使張體義薦舉

命往廣東以州縣試用題補七署縣篆潔已奉公勤恤民隱振興文教獄多平反所至胥有循聲初任封川會粵西大憲以封川開建二邑逼近梧州欲割附之東

浮山縣志

卷之二十一

人物

九

省大憲飭議德徵以封川為東省關鍵不便改隸開建乃封川後戶尤為要地堅詳呈覆各憲嘉其卓識卒從其議其任始與有惡丐謀殺人命圖賴官姓者德徵據情審擬署守楊倅悞疑官姓鬪毆致命再四翻駁德徵詳覆如初楊倅堅執意見鍛鍊具詳經臬憲一訊曲直立判撫軍亟稱其賢明繼任仁化四十餘年科甲寂寂德徵召集生童訂期督課文風丕變時夏苗方秀忽生野虫百姓惶惶德徵虔禱於城隍廟祝畢風起野滅民乃有秋人以為精誠上格神靈也其在陽春寇盜時警德徵詳請添設巡司以資防護商賈往來無虞又有盜掘守備幼子之塚者守疑係近莊平民堅欲夾訊德徵謂其無據設法暗訪果得正犯平民之寃白守備之疑釋及泄從化當水患之後前令布置失宜民多失所德徵夙夜焦勞多方安置民皆樂業胥感再造之恩會丁母憂聞訃一瀉幾絕抱病奔喪號泣不絕竟以哭母致疾而卒人合

以才未大展惜之著有律例圖鏡增訂洗冤錄藏於家

陳奇畧

字建三博通經史砥礪廉隅友兄弟篤朋友講學論文娓娓不倦主盟文社者三十餘年學者

宗之

張

壺

字峻公號巍峩少孤有令名器識遠大博學強記事孀母以孝先意承志敬養無間遇母疾親

侍湯藥晝夜匪懈家素饒躬率節儉以任恤為懷浮岳兩邑貧人舊多負欠約銀二千餘金粟三千餘石壺意欲蠲之請命於母母嘉其志悉焚其券霍民有連姓者奉官鬻女以完公項其父女生離難割苦狀母甚憐之即順承母意贈金還女焉康熙辛未蝗蝻為災食禾殆盡壺發錢數十萬通告四鄉捕蝗一斗者給錢五十文其被災重處復捐米以賑之全活無算迨乘鐸潞城每月講課六次捐資以備諸生紙筆

浮山縣志

卷之二十一

人物

三

飲食中有極貧者復量助資斧潞士多所造就尋陞山東棲霞令會母罹地震之變在京聞訃星夜奔喪號泣悲痛幾不欲生歲時伏臘必祭必哀痛母傷非命抱恨終天隱居不仕者二十餘載後以部催強起再補湖廣鄆縣令鄆俗頑詐甫下車拊循良善抑鋤豪強潔已奉公勞心撫字一切陋規及行戶賠累諸弊悉行裁革鄆邑久不發科設立義學延師訓課更給膏火時行獎勵諸生內有扶道洪者家最寒尤加意周卹俾無內顧之憂得以肆力詩書丙午獲售癸丑成進士鄆邑文風從此丕振科甲相繼人比於昌黎之治潮云民有訟子不孝者召子留署朝夕曉諭講明父子天倫大義其子感悟率以孝聞先是鄰郡王倅署鄆壺接受交代曾以直忤後王署本郡篆計圖洩忿壺窺其意縷列王倅向時索累情節通詳辭職撫軍松五趙公直其事而嘉其風力以剛峰稱之適董學臺歲試衡郡趙公特委監試以杜賄私是考

風清弊絕拔取者均係真才趙公愈加信任鄴例編
審照舊徵收盡始革除老弱孤獨易以少壯鄴民甚
德之凡一切詞訟令原告自拘不差一役不擾一民
而賦完訟清民安樂業嗣以趙公陞任風氣少變遂
托病解組去之日老幼攀轅泣送百里外建立生祠
春秋祀享不衰旋里後娛意林泉益修善舉設清河
書院立文明社延請名宿有文望者主課集生童會
文藝造就多士本族戶大人繁倍加篤厚能者給以
資本營運不能者時加賑恤復於年終不惜百金濟
其匱乏歲以為常辛丑壬寅兩歲大饑民不聊生盡
首倡捐米六百餘石及諸有力者其得米二千餘石
在城隍廟設廠擇不能舉火者按口散給百姓無流
離之苦復散給麥籽俾民播種他如修城垣建社倉
葺村堡置茶亭媿先賢事實於石碣給諸生鄉試以
路費凡補偏救弊恤患分災或倡義於先或獨任其
事慷慨尚義畧無難色邑人待以舉火者數千家年

浮山縣志

卷之二十一

人物

三

七十三以壽終子六人孫曾十餘人俱膺顯榮鄉黨
思其德建祠以祀焉

李日升

字升華歲貢生博學強識品行端方教授生徒
曲成善誘一時從遊多所成就父年八旬偶得

痢疾朝夕奉侍醫藥罔效升焚香禱天乞減已算延
父壽一紀病果獲愈僉謂孝感所致尤力行善舉施
丸膏以濟民病修橋路以利人行時邑侯潘公新任
不諳催科悞聽左右每里標發十名糧單嚴刑征比
里人苦之升以薄歛緩征休養生具呈潘公納之
後秉鐸孝義一切修贄槩不收受惟以訓課士子為
務內有貧寒之士給以膏
火令肄業學舍多士欽之

張體仁

字悅巖號松溪生而穎悟器識過人七歲行文
便有奇氣弱冠遊泮性至孝事親能先意承志

母歿哀毀骨立喪葬如禮奉繼母無異本生由歲貢
選授繁峙教諭時繁邑學宮傾圮捐貲修補集士課

藝期年文風丕變陞戶部郎中廉介自持時有以奏銷事暮夜餽金者正色却曰吾豈以阿堵物紊朝廷成規耶奉差清查兩淮益務杜絕苞苴禁吏胥之侵擾察奸人之駑騙奏免各商拖欠代認李織造賠累減費數百萬復命後因直隸正定等處荒歉饑民逃散京畿奉

命押送回藉各給資斧戒慰兼至無一人敢違者尋擢守濟南郡大事繁案無留牘正已率屬弊絕風清墮躄為災捐俸捕治歲得大稔是時東省糧儲多積府治捐金三千建立倉廩既不動帑亦不派累各屬上下均有裨益旋陞山東濟東泰武通省驛傳水利道例有驛站陋規悉行革除維時總制田忌其清直密摺奏請內用蒙

硃批諭日部郎內如張體仁者有幾監司之任綽然有餘東省各員中朕將置伊於第一第二之列內調間曹殊屬可惜弗允所請奉

浮山縣志 卷之二十一 人物

三

旨督理曲阜至聖廟工及承修孔林經營盡善沂府一帶秋雨連旬奉委賑恤無濫無遺提調文武兩闈十餘次肅清場規寬嚴並濟兩署臬篆申冤剔枉在省釋無辜一署糧篆嚴禁積弊漕政肅清歷任山東十餘年凡興修水利督緝盜賊軍民胥愛戴焉以乾隆辛酉丁父憂卒於家人僉以大用未竟為惜云

張永諧 字補齋邑諸生髫年聲溢黌序試輒冠軍為督學使者慎德齋先生所賞識許以翰苑才乃生平積學功深苦志以歿善制藝力追嘉思而以陳句山方文輯兩先生為入門階梯每搆一藝聚精會神必極心愜意而後止所居有三隅書屋攜兩弟肄業其中怡怡如也教兩弟俾各成立秦澗泉學士常評其文謂幽蘭無人情

暉自遠洵不誣也

張永鑑

字右三號霽園乾隆壬申連捷成進士授陝西商州山陽縣尹有政聲未幾以告養歸當為諸

生時與兄永諧弟永諤俱以能文稱有難兄難弟之目而頃篋迭奏玉石交攻每試輒鼎峙前茅片紙隻字無不膾炙人口所為文沈雄雅健根極理要領取神韻和平淵永而無傲辟喬志之音以兄及第並已之作同梓名三隅合稿行世陳蓮宇先生秦澗泉學士皆為之序而傳之

張永諤

字曙邨乾隆癸酉科以選拔貢於成均復登鄉薦後秉垣曲鐸與兩兄下帷攻苦朝夕切劘雄

長膠序蜚聲太學間名藉甚一時論文者莫不推張氏有三鳳之稱秦澗泉學士評其文謂如春華來被

草石開鮮極推許之

段

玠

字介藩號瀛波邑東南社嶺莊人以商學弟子員舉乾隆壬申恩科順天鄉薦乙卯由大挑

知縣分發福建初任平和縣民俗刁悍號稱難治乃寓慈祥於威猛有豪強奪寡婦田莫敢誰何訪得繩

浮山縣志

卷之二十一

人物

三

以法皆翕然稱善政公餘進諸生論文藝以鼓舞作興之大府嘉其能調侯官為省會首邑會審各處案件往往雞鳴而興日昃不遑食而本衙事多於燈下理之案無滯牘習俗龐雜盜賊不時竊發以為不清盜源則難為理募壯丁四出搜捕拏獲海洋巨盜施德周等十八名由是令行禁止制府以明白朴實辦事奮勉列薦劾引見記名軍機處升台灣府淡水同知台灣孤懸海外叢林山峪中生番出沒無常為民患抵任後嚴懲生番力杜奸弊而民獲安業特旨擢廣東潮州知府去閩之日番民扶老攜幼望舟拜送榼酒數十里去思遺愛豐碑屹然潮為嶺海雄郡無賴游棍多倚蠻戶為淵藪飭屬各遵行保甲嚴禁花船以消匪類民樂安居尋署惠潮嘉兵備道兼攝鹽運分司篆以憂歸服除授貴州鎮遠府謝恩請訓時蒙顧問拏盜舊事奏對稱旨奉溫諭獎勉遂南行中途丁母憂服闋授四川敘州府敘

為川南要地除弊興利一如治潮時當是時大軍
平金川承辦軍需頗難其人制府知其能特以雅州
隆昌驛委之兵民稱便遂以勤幹老練膺卓薦調守
夔州權松茂道篆敘之民士多作詩歌以頌之有五
馬嘶風天下有一廉如水世間無江城此日擁姚馬
民吏何年祈寇車等句皆紀實也旋奉旨升授江
西通省督糧道積勞成疾卒於官現因江西省修志
者取行述家傳其宦績事實已載入江西通志名宦
列傳中

張道源

字菊坡體乾子幼嗜詩書工篆隸弱冠負幹濟
才入貲為郎授刑部員外以憂歸服除補江蘇
司員外轉本部郎中出知廣東南雄旋調守廣州歷
署糧道鹽運司以卓薦升浙江甯紹台道遷湖北漢
黃德道兩權臬篆在官中外四十餘年不名一錢始
以京職總辦秋審處論實緩皆如律大學士劉文正

浮山縣志

卷之二十一

人物

三

公統勳協辦大學士英公廉胥奇其才其出守南雄
也革除陋規廉聲丕著及調廣州適當台灣安南之
變佐理軍需大為制府孫公士毅福公相康安所倚
任澳門民夷雜處時暎夷因忿殺人匿不交兇將拒
捕撫軍圖公制軍孫公將以大兵剿除之乃請命二
公曰以小忿而加之兵是激之使亂也亂而加之罪
是不教而殺也且一夷有罪羣夷何辜盡置之死地
甚非朝廷懷柔遠人意遂輕舟抵澳示以天朝
恩威撫而諭之夷人皆感泣乃交兇於是誅一夷而
羣夷獲安赴浙之日軍民士庶餞送者不絕於道尋
以佐福公相勦平苗匪功奉旨賞戴花翎福公相
嘗語諸司道曰張知府遇大事有卓識大力吾實敬
畏之豈偶然哉

崔錫榮

字笏牀號午莊生而聰慧未成童淹通六籍舉
茂才每試冠軍為莫寶齋學使所激賞辛酉舉

於鄉至辛未始成進士入為內閣中書舍人請外補初令河南西平邑隸汝南土瘠民貧俗獯悍稱難治以經術為治譜寬猛相濟而仁心為質未常罪一無辜乃撫字心勞而催科政拙竟以鹽筴壅滯望吏議去任之日民皆攀轅卧轍流涕追送不絕於道當事者察其慈惠慰留之移調寶豐矢厥公慎設施一如治西平時嘗言為政無他術第公則明耳咸以為名言三載考績當報最乃以親老陳情乞養歸退居林泉非公不至其清介如此

張道渥

字水屋工詩善書畫時稱三絕山水法大癡能得其意人物鳥獸以及雜卉竹石諸小品亦點

染生動有別趣性憨直喜交遊其詩嘗為袁簡齋太史所賞采入隨園詩話初以鹺務官需次兩淮在維揚與吳穀人羅兩峯諸公交最契及官蜀復為制府孫補山先生所器後為直隸蔚州牧以老去官歸日

浮山縣志

卷之二十一 人物

三

事吟詠蒔花種竹以詩酒樂餘年所著有水屋贖稿二卷付梓行於世

楊永錫

邑楊村河人原任四川達州東鄉縣典史嘉慶元年以勦捕川陝黔楚河南等處賊匪陣亡奉

旨賞給雲騎尉世職襲次完時給子恩騎尉世襲罔替

張家本

字虞三號宜甫道源仲子也初以貲為部郎尋改捐直隸州牧歷署易州遵化西路廳篆俱以

能職稱奏補遵化甫下車即訪獲積年巨盜以除民害州為皇陵重地每歲差務殷繁設施井井民不擾而事咸理時豐潤海灘鹽梟滋事令請以三營都司協擊俱被逐回遂以臬眾拒捕聞大府即檄通永道會馬蘭鎮帶兵勦捕在州聞訊輕騎疾馳至海濱諭眾曰爾等不遵王化自蹈罪戾我念爾等俱有父母室家妻孥特來救汝汝能聽我言我當為爾等請命否則大兵一至無噍類矣眾皆號泣乞命遂自縛

百餘人以獻比觀察至而事平矣初豐潤令以是案得罪將去官有老母無以為養乃即所獲首犯子之俾得復官人以是多其能讓州與欒州接壤有傷斃橫屍莫得主名有孫合者報兩州會驗微察屍脇傷痕與孫履跡相符一鞠而伏案定而未嘗妄刑一人闔郡頌神明焉尋失察屬民傳習邪教部議鑄級時制府溫公景嶠以出色人員奏請在任捐復適教匪林清滋事委辦豫東三省兵差所需車馬捐廉雇覓削平後邀軍功加級遵化向無義倉大憲檄飭勸捐乃以州民差徭繁重請自捐三百石為民乞免再請再駁不得已以其故論諸民咸感其德踴躍樂輸得穀五千石銀三千餘兩擇地建倉費不敷復捐廉足之事竣彙奏邀 恩從優議 敘未幾以憂去任卒於津門

喬振霄

字漢西號讓泉邑東郭村人篤行謹飭廉隅自守而學有淵源父侗齋尤深經學折衷諸儒春

浮山縣志

卷之二十一 人物

三

秋之要彙為一編以授之以故經術湛深乃平生積學能文僅博一衿淹滯棘闈屢薦不售以 恩貢終遂絕意進取偃仰一室左圖右書翛然也寓志於醫活人甚眾教授生徒尤以誘掖後進為務不為放言高論而循循有規一時 翹楚之士多出其門

吳元煥

字孔炤號梅岑邑東吳家坡人幼穎悟讀書十行並下長而勤學為文曲折秀逸不襲時尚每藝成老宿咸驚服登乾隆辛卯賢書截取例得知縣乃淡於仕進決計就教職選授隰州學正平日設教因材而施循循善誘及其門者多所成就焉

葛德新

邑南王村人陝西大荔縣典史嘉慶年間以拏獲張格爾案內要犯送部引 見荷 特恩召對垂問拏賊情形奏對稱 旨大蒙嘉獎 遂奉 特旨升授蓋屋縣知縣有廉能聲

賈子窩

字仲良號菊禪邑諸生以繪事著名於時工山水氣韻深厚得元人法而尤善於畫菊水墨寫

意為黃花別開生面間或陪襯竹石縱橫跌宕揮灑淋漓妙品也家貧晚年以畫遊於臨洪襄翼間卒老

死於牖下

楊

約

字簡侯號清夫邑諸生工詩善書真楷行草及

而尤神似香光性瀟灑喜交遊座上客常滿所往還皆知名士飲酒賦詩論文讀畫無虛日極一時文酒之樂然不善治家人生產家遂中落援例捐州佐得黔南以道遠資匱未能即往卒以貧死於家著有清夫唵稿一卷

陳

壟

邑中村人道光丁酉科中式武舉効力太原鎮標候補把總咸豐三年八月粵匪竄晉陷平陽

浮山縣志

卷之二十一

人物

三

府因派巡城禦賊遇害奉旨賜卹加增千總銜賞

給雲騎尉世職襲次完時給予恩騎尉世襲罔替子

耀南

襲

程啟泰

字沃臣號芸畦性敏好學弱冠補博士弟子員旋食餼鄉里推名宿道光丁酉應拔萃科為學

使周石芳先生所賞識已入選既而抑置之曰生乃科甲中人豈可以選拔限邪後舉辛巳恩科鄉薦

前邑令陳公劍芝議修書院講舍邀董其事後署令李公樂庭重其品學延主神山書院講席教士有方

從游者甚眾子

懋敬邑廩生

張華銑

號蓮渠邑布衣工詩善吟詠所著有古今體詩十卷以家貧無力付梓遺稿遂散佚無存

劉淑原

字次村號曉園邑東門內舜德里人少孤力學補弟子員旋以優等食餼有聲庠序間家貧舌

耕養母淡泊自甘屢應鄉試連不得志於有司卒以
歲貢終能篆隸喜吟詠著有曉園詩草四卷未梓存
於家

秦

鋼

字青鋒號仲金秉直次子幼聰敏六歲出就外
童目之年十三補弟子員受知於督學陳公官俊許
爲大器屢應鄉試不售遂由增貢援例捐復設訓導
署太原府學教授時勞辛階制府爲冀甯觀察一見
深器之卽委辦晉陽書院監院事後權嵐縣學鐸教
士有方文風丕變性好吟詠著
有雜體詩二卷存於家未梓

張甸青

字禹坪號青圃世居城內由太學生援例捐都
司銜少應童試不售遂棄儒業商然猶留心經

史披覽弗倦雖以營運起家非素志也尤
喜吟詠著有主月吟雜體詩數卷未梓

浮山縣志

卷之二十一

人物

三

李重遠

字耐軒邑南蛟頭河人性嗜學入邑庠以優等
食餼讀書窮理務求心得不區區作章句儒尤

病諸儒聚訟之習故不輕著述嘗云聖賢之書教人
行非教人言也而生平端方嚴正皆能如其所言教
授生徒亦必文行交勉是以信從者衆旣沒之後
門人追憶典型不忍淹沒勒諸碑石以銘德教

李濟時

字溥生號古愚乾隆癸卯歲貢幼秉庭訓飭躬
恂謹爲學務敦本實不邀聲譽粗衣糲食澹然

自足誘人尤循循有法多所成就
卒年六十有七門人爲立德教碑

